

1394

46

LE FILS  
DE  
L'IMPVDIQUE;  
ET  
LE PERFIDE  
VOLVPTVEVX.



A PARIS;  
Chez DENYS LANGLOIS, aumont S. Hilaire,  
à l'enfeigne du Pelican.

---

M. DC. XLIX.



LE FILS  
DE  
L'IMPÉRIAL  
ET  
LE PÉRIODE  
VOLPTUEUX.



A PARIS.  
Chez DENT & LANGLOIS, au Salon de Peinture.  
à l'enseigne du Pelican.

M. DC. XLIX.



# LE FILS DE L'IMPVDIQUE;

ET

## LE PERFIDE VOLVPTVEVX.



A Sicile que l'on sçait estre suiette au Roy d'Espagne, lieu d'abomination, la sentine, & le receptacle des mauuaises qualitez des autres Nations, le repaire & la retraite de tous les voleurs de l'Vniuers, l'azile & le refuge de tous les scelerats, le cloaque d'infamie, la terre maudite de Dieu, & des gens de bien, a iusques icy esté supportable, & le seroit encore, si elle retenoit enclos dans son sein le Monstre, ou plutôt le Vipere, qu'elle a produit.

Quand tous les François voudroient par la force de leur vertu ordinaire, estouffer leurs iustes indignations contre ce perfide Mazarin: Cette Prouince, quoy que remplie d'impieté, ne pourroit se retenir de lancer sur sa maudite production, les foudres de sa vengeance, & sans doute l'auroit-elle desia fait, si ce traître à son Roy, & à sa Patrie, ne s'estoit refugié dans ce Royaume, lequel dès son premier abord a esté tellement infecté de son venin, qu'il a commencé à perdre sa splendeur, & enfin par succession de temps l'a reduict dans vne si grande extremité, que de memoire d'homme il ne s'est iamais rien veu de semblable.

Toute la Nature témoigne des regrets si sensibles, d'auoir donné iour à vn si malheureux homme, & il semble à la voir qu'elle vueille prendre les armes pour le détruire;



chose si certaine, qu'il ne seroit pas beaucoup difficile de reconnoistre la verité de cecy, & remarquer par les tempestes & orages qu'elle a excitées, qu'elle prend part à l'affliction de la France, & qu'elle concourt avec elle au chastiment de ce Voleur, dont l'origine & la vie sont égallémēt méchantre; & il y a grande apparence que si Dieu par vn excez de sa misericorde ne le touche, que sa fin sera semblable.

Cét inique a pris naissance dans vn petit village de la Sicile; quelques-vns pour colorer la verité, & ne le pas faire passer pour ce qu'il est, assurent, mais sans aucun fondement, que son pere estoit marchand, & que n'ayant pas réussi dans son trafic, il fut obligé de faire banqueroute. D'autres mieux instruits disent, que son pere, qui auoit pris naissance d'un Iuif, se rendit Chrestien, & que dans le commencement de sa conuersiō, il fit en sorte de se captiuier la bienveillance du peuple, afin d'oster la mauuaise opinion qu'on auoit qu'il iudaïssoit. D'assurer qu'il fut marchand, c'est ce que l'on ne peut pour deux raisons: La premiere qu'il estoit fort pauvre, & partant incapable, du moins, d'exercer vn trafic honorable: La seconde, qui est la plus probable, & qu'il fut fait Curé de son village, en laquelle charge il vécut assez long-temps avec vn infame, qu'il gardoit sous pretexte que c'estoit sa seruante, de laquelle il eut deux enfans, dont l'un estoit fol & idiot, & l'autre remply de malice & d'astuce, que l'on appella Iulles Mazarin.

Dés son bas âge il donna des marques de ce qu'il seroit vn iour, & ceux qui le connoissent assurent qu'il a esté né sous vne planette si mauuaise, qu'il n'y a point d'homme dans le monde, pour méchant qu'il puisse estre, sur lequel les astres ayent enuoyé de si maudites influences; iusques-là mesme qu'ils ont creu que cette terre ingrate & infertile en



gens de bien auoit fait vn effort sur soy pour se purger, & qu'ayant ramassé toutes ses mauuaises qualitez & humeurs, elle en auoit fait vn pressis, ou vn abregé en la personne dudit Iulles Mazarin, lequel ayant acquis vn peu d'âge, n'ayant qu'un tres-méchant habit, déroba tout ce qu'il peut à son pere, & s'enfuit sans rien dire. Après estre arriué à Rome aux dépens de monsieur le Curé: tout gueux & miserable, il commença à étaler sa marchandise, & se seruir de ses fineses pleines de malices; & pour gagner le cœur de quelques personnes brutales, il n'eût point de honte de se produire & d'exercer le plus infame & lâche commerce, que pour ne pas offenser les oreilles des gens de bien, il est plus à propos de taire, que de dire. Il fut quelque temps laquais, & depuis estant valet de chambre, il se fit passer pour gentilhomme; ce fut en ce temps qu'il donna lieu à ses pilleries, lesquelles depuis il n'a iamais sçeu borner. S'estant ainsi accommodé aux dépens d'autrui, & par l'exercice ordinaire de son infamie, il s'acquit l'affection d'un eminent personnage, de l'autorité duquel estat appuyé, il n'y a vice dans lequel il ne se soit plongé, sans crainte de l'ire de Dieu, & de la punition qu'il meritoit.

Ayant reconnu que l'Italien n'estoit pas suffisante, non plus que l'Espagne, pour fournir à ses voleries, il se resolut de quelque façon que ce peut-estre, de trouuer les moyens de venir en France, qu'il sçauoit estre tres-riche & abondante en toutes choses, à quoy en effect il a reüssi, mais par des voyes si pernicieuses, & pleines de perfidie, qu'elles font connoistre d'elles mesmes la lâcheté & la malice de leur auteur, ayant sur leur frontispice la plus insigne trahison qui ait iamais esté commise. Tout le monde sçait qu'ayant esté enuoyé à Casal, au lieu d'auoir agy fidelement en



personne d'honneur, il vendit lâchement son Roy, son  
 Maistre, & sa Patrie; ce qui luy donna entrée auprès de Mon-  
 sieur le Cardinal de Richelieu, à la memoire duquel la Frâ-  
 ce est redeuable; lequel quoy que tres-grand Genie, cōmit  
 pourtant en ce rencontre vne lourde faute cōtre la maxime  
 generale, qui veut que l'on se serue de la trahison, mais non  
 jamais du traître, permettant que ce loup affamé, & cupide  
 des richesses, mit le pied dās la France, où estant il eut assez  
 d'adresse par le moyé de ses fourberies ordinaires qu'il cou-  
 uroit malicieusement l'apparence de pieté, de se conseruer  
 auprès de luy, à tel point que ledit sieur Cardinal de Riche-  
 lieu a procuré par les soins & poursuittes, que cet homme  
 de neant ait esté élevé à la principauté Ecclesiastique; Ce  
 qu'il ne peut obtenir sans grande difficulté, attendu que ce  
 peruers estoit connu dans l'Italie, mais particulièrement à  
 Rome, pour le plus lâche & poltron de tous les hommes, &  
 que sa vie y auoit seruy d'une planche à toutes sortes de vi-  
 ces, & que la pluspart de la ieunesse n'auoit esté corrompue  
 que par sa maudite pratique. Neantmoins le Pape defunet,  
 qui aimoit grandement la France, ne peût refuser les prieres  
 du feu Cardinal de Richelieu, pour deux raisons; la premie-  
 re, pour donner des marques de son amitié à ce Royaume,  
 car en cela il est certain qu'il se faisoit vne grande violence  
 à sa consideration; la seconde, qu'il creût que peutestre ce  
 malheureux changeroit de vie, quand il se verroit élevé dās  
 vne si haute dignité: Mais hélas! tout le contraire est ar-  
 riué, car ayant oublié ce qu'il estoit par le lustre de sa pour-  
 pre, il a creu qu'impunément il luy estoit permis de com-  
 mettre toutes sortes d'excez & de sacrileges, mesme iusques  
 à vendre des Benefices.

Le Roy tres-Chrestien Louys XIII. estant mort, & l'e-



minentissime Cardinal de Richelieu, il estima qu'il n'y de-  
 uoit auoir personne qui ne fléchist soubs sa loy tyrannique,  
 pour laquelle establir il se couurit de la peau de brebis, afin  
 de gagner l'affectiō de la Reyne, & des Princes; ce qui luy  
 succeda si bien, qu'en peu de temps il s'acquit vn tel empire  
 & autorité, qu'il ne se trouuoit personne mesme d'entre  
 les principaux du Royaume, qui eust osé entreprendre de  
 s'opposer à ce torrent d'iniquité: C'est pour lors qu'ayant  
 leué le masque, il fit connoistre à vn chacun, que cette peau  
 de brebis, dōt il estoit reuētu, ne couuroit autre chose qu'un  
 lyon enragé, lequel se seruant de Ministres à sa poste, a eu  
 l'effronterie de s'attaquer au Sang Royal, exposant les vns  
 à des dangers manifestes, & emprisonnant les autres sur des  
 faux pretextes, pour auoir lieu de piller à droit & à gauche,  
 & ainsi venir à bout de ses execrables desseins, desquels il a  
 eu vn tel succez, qu'il a reduit la France dans vn estat si mi-  
 serable par ses maximes Siciliennes, qu'au lieu de triompher  
 dans ses Victoires, elle est obligée de gémir sous ses propres  
 ruines qui l'accablent par la violence de cēt Ennemy qu'elle  
 a au dedans de soy. Mais il y a de l'apparence qu'elle se  
 purgera de ce venin, non seulemēt en la personne de ce per-  
 fide, mais encore de celle de tous ses Suppôts, lesquels ont  
 creu, aussi bien que luy, qu'ils auoient permission de voler,  
 piller, & ruiner, sans que personne leur osât demander vne  
 reddition de compte: en quoy ils se sont abusez, car Dieu  
 qui est Iuste, a voulu que ceux qui representent sa Maïesté  
 diuine sur la terre se seruissent du pouuoir qu'il leur a dōné,  
 pour empêcher que l'Autorité Royale ne fût dauantage  
 foulée aux pieds par ces ministres de Satan, & les obliger de  
 reuenir à eux, & à la raison. Mais tant s'en faut que ces  
 Dieux sur la terre ayent opéré à la conuersion de ce mal-



heureux, au contraire, il a changé la medecine en poison, & par ses factions tres-dangereuses, a mis toutes choses d'as vne combustion & desordre si grand, que pour y apporter remede, cét Auguste Senat, dont il a tant de fois éprouué la misericorde, est obligé d'y proceder dans les voyes de la plus rigoureuse iustice, & d'y apporter le fer & le feu, attédu qu'aux maux extrêmes il y faut des remedes extrêmes.

La France ingera quel doit estre ce personnage, si elle fait reflexion sur le lieu de sa naissance, estant certain que pour faire voir qu'un homme est méchant iusques dans l'exccez, il suffit de dire qu'il est Sicilien: Et en effet, qui a iamais rien veu d'égal, il a trahy son pere, son Roy, sa Patrie, & tous ceux qui luy ont fait du bien: Et enfin chose horrible il a trahy la France à qui il doit tout ce qu'il est; mesme il a eule front de tromper la Royne sous vne apparence de vertu. Mais Dieu qui regarde tousiours ce Royaume d'un œil fauorable, n'a pas souffert que cét impie ait reüssi dans ses malheureux desseins, & permettra sans doute que ce theatre sur lequel il a sacrifié tant de victimes innocentes à ses brutales passions, sera le lieu où il fera vne fin pleine d'ignominie pour corrépondre à sa naissance, ce qui seruira d'un exemple eternel à la Posterité. Il n'y a point de personnes veritablement Chrestiennes qui ne luy doiuent souhaitter vne fin de cette sorte, parce que c'est l'unique moyé d'attirer sur luy la misericorde de Dieu, qui l'attend encore à resipiscence, moyénant pourtant qu'il restituë à la France tant de millions qu'il luy a enleuez, sans quoy il ne peut obtenir pardon.

FIN.